

四庫全書

集部

欽定四庫全書

華陽集卷十六

宋 王珪 撰

制詞 齋文 剃髮文 賀詞

紫宸殿開啓祈雨道場齋文

伏以淑律過中驕陽作沴嚮歸慈於梵席蘄濟望於農
疇而密雲雖興膏澤未應念歲事之如灼被宸塗而載
嚴尚冀至心之通終垂能力之助

集英殿開啓祈雨道場齋文

伏以自春涉夏陰陽鬱并雨弗降滋至於害歲嗣膺丕
統焦勞如焚有覺大慈力隨普應

集英殿開啟護摩祈雨道場齋文

伏以方夏長物雨弗降滋嘉種用傷歲將安仰乃祓祕
殿歸崇妙緣庶興能仁徧澤羣土

集英殿開啟祈雨粉壇道場齋文

伏以驕陽薄陰秋氣未附密雲留雨農疇靡滋結祕法
於道場假能仁於溥界默回嘉應大澤羣元

集英殿接續開啓祈雨道場齋文

伏以秋籥適中天未降澤農疇皆槁民將遇饑敢載禱
於禁楹庸嗣嚴於梵席終蘄慧力溥濟含生

西京無畏三藏前開啓祈雨道場齋文二道

伏以方春東作雨弗降滋歲事將虧羣心如灼大慈濟
物應現無方油然興雲以澤萬物

伏以秋氣已肅亢陽薄陰槁禾盈疇民望如灼大慈覺
世通於至忱油然興雲徧澤嘉植

西京竺法三藏泗州普照明覺大師前開啓祈
雨道場齋文

伏以春夏之交雨不時降宿麥將瘁民咨亡聊顧守邦
圖永思厥咎大慈濟物通于至忱彌沴為祥期布嘉澤
紫宸殿開啓謝雨道場齋文

向以驕陽作沴雨澤愆時爰被禁宸載崇梵席蒙應如
答降滋及期仰信覺慈庸申美報

集英殿開啓謝雨道場齋文

嚮以驕陽作沴潤澤愆期爰被禁塗夙崇梵會至誠如
答不日蒙滋歸信能仁用虔美報

九龍堂開啓謝雨道場齋文

伏以興雲上漢神化莫形油然垂陰膏潤萬物潮音振
坐大啓法筵締果謝成益期豐楹

西京無畏三藏前開啓謝雨道場齋文

比以春陽隔并時雨僭亢夙祈慈力善濟涵生俄天澤
之應期寔邦氓之慰望爰憑妙果庶答靈休

集英殿接續開啓祈雪粉壇道場齋文

伏以大冬薄歲溫氣乘陰竊循天沴之來專儆君臨之失反躬是懼終食靡寧載祇被於靈場庶妙施於慧力早變同雲之族終凝密霰之祥

普安院開啓附葬道場齋文

向以諸邱之喪引車西葬哀踊之鉅震于邃庭寶藏緒經導佛法力仰懷遺範庶矣安寧

宣祖忌辰道場齋文

以下三道
舍人院

伏以神功被世寔開帝運之基法御賓天順仗佛因之
薦宣祖皇帝勃興景烈垂裕燕謀道積累之深仁濟艱
難之大業訓猷雖邈靈睿如存今皇帝紹宅休期逖追
先憲陳常時夏於念思文之功荷天之休永崇長發之
禘載感諱辰之奉夙嚴梵供之修宣祖皇帝受記真乘
凝神寶坐灑甘露於法界燭慧燈於迷途今皇帝伏願
壽疑金輪福齊沙劫席皇圖之繇固納美俗於熙寧然
後願鼎路同寅戚藩一德上屬雲天之會下窮海寓之

幽凡暨涵生普霑勝惠

真宗忌辰道場齋文

伏以紫極收神永悼六飛之駕靈宮追福式研衆妙之
門恭惟真宗皇帝仁洽九圍道超千古奉綠圖於翠水
對玉檢於右閭脫屣之期遽游於僊嶽遺弓之感空慕
於塵寰今皇帝明篤孝誠通祇聖則載履撤音之旦重
深濡露之恩是用宣九清之秘文資三洞之真果真宗
皇帝伏願儲精玉境度品珠臺永保在天之靈下綏卜

世之福今皇帝伏願撫國長楸納民太和躋聖德於日
升等帝齡於天覆然後願蔭周羣辟長扶鞏固之基樂
及含生盡沐希夷之化

文懿皇后忌辰道場齋文

伏以旋九天之馭已邈於徽音倡諸佛之詮是憑於勝
福文懿皇后躬肅雍之德稟柔順之儀助正道於先朝
留深慈於後廟今皇帝緬追遺懿明發孝思載蠲常樂
之辰式仗度門之薦文懿皇后伏願垂二梵之果超羣

生之迷灑甘露於神天妙大雲於法界今皇帝伏願皇
圖日楙聖業天隆致中和於萬靈一聲教於殊俗然後
願台躔永耀宗葉長榮盡有相於幽明享無邊之威力

內中延福宮開啓祈福護摩道場齋文

顧以眇躬嗣於丕基念萬機之叢慮懼五事之失中緬
企正覺之乘會歸妙智之力庶緣勝利永輔皇休

溫成皇后獻陵殿內開啓冬節道場齋文

伏以光靈所宅崇奉有儀因令節以重修冀上乘之祈

助仰希錫福俯建含生

後苑以天王殿拆收了畢齋文

伏以擬辰居之奧密飭祀像之嚴威繕治告功被齋祈
福庶憑至善永保多盤

南郊青城綵內畢功大殿上開啟保安祝壽諷
孔雀明王經齋文

伏以祀兆方嚴齋場夙設實延淨衆開誦梵文既蒙大
施之仁助錫丕平之福

南郊青城綵內畢功大殿上開啟保安祝壽諷
法華經齋文

伏以惟宮既具皇邸將臨發誦秘文施其景福仰惟覺
慈之覆俯綏禋享之誠

天章閣延昌殿開啟權奉安英宗皇帝御容道
場齋文

伏以翠旄所御玉色如存將改蒞於清間少即安於秘
近旁招淨衆仰助勝緣憑妙覺之總持冀皇靈之升濟

內中福寧殿英宗二七水陸道場齋文

伏以爽德在天空結遺氓之慕大雄出世普隨涵識之緣瞻金色之妙儀倣龍華之法會庶資覺力仰助遐昇

內中龍圖天章寶閣開啟英宗忌辰道場齋文

伏以賓天不復莫窮僊御之遊應物有緣須仗佛乘之果屬撤音之初旦結種善之法筵庶致念於真空益助嚴於超識

神宗皇帝第二女剝胎髮文

伏以叶洽之年姑洗之月動星彩於瑤精發神光於紫闥月娣分相王姬擅榮珠璣具文祿之飾環珮下丹臺之聲儀同聖表惠若天成貴專九御之保喜洽三宮之情百辰斯滿此日維良移鳳幄祓椒堂宮蟾吐水仙篆浮香裁輕雲於寶鏤濯宿粉於蘭湯承皇愛兮無有窮姿日麗兮德日聰同君王兮萬壽踵娥英之後風

東嶽生辰賀詞二道

伏以瞻彼喬嶽奠于東方逖欽至化之神默定羣元之

命屬杪春之誕序按秘洞之冲科尚格精衷丕錫羣福
伏以維天之孫作地之鎮紀舊傳於嘉俗祠始誕于杪
春祇循秘洞之科具繹靈函之蘊庶閱道蔭永楸涵生

乾元節內中御侍已下賀詞

妾等言伏以赤符肇德氣垂九夏之初華渚流輝運啟
千齡之際恭惟尊號皇帝陛下躬行禹儉聽比堯聰撫

四海以宅尊膺三靈之薦祉妾等班塵近掖慶屬熙朝
適逢誕聖之期永祝如山之算

內中御侍已下賀皇帝冬節詞三道

妾等言伏以漢臺謹歷測星候以觀祥嶰籥均時聽宮

鳴而升煦伏惟

尊號

皇帝陛下茂承天序丕覽化樞擁

上帝之珍符踐三微之穀旦至明所燭煥如愛景之長

睿算無窮屹若崇岡之固妾等幸參宮職獲講聖期再

乘一氣之萌率罄九宸之祝

妾等言伏以陽生漢殿合雋士之八能瑞載魯臺備祥

雲之五物恭惟皇帝陛下堯聰天發禹化神敷深拱蠖

獲之居獨觀昭曠之道水泉初動方建統于天元霜露
所需率薦休于邦祚妾等早塵近掖過奉明恩逢嘉節
之載新浹柔悰而共忭

妾等言伏以玉琯旋宮肇應新陽之復珠躔合度密符
寶歷之觀恭惟皇帝陛下聖德廣施神聰濬發紹美百
王之度留精萬務之微景福來同如大川之方至皇明
所燭與愛日以偕長妾等早沐宸憐並塵禁侍逢三正
之首序率羣抃之一情

內中御侍已下賀太皇太后冬節詞

妾等言伏以漢殿迎陽合八能於嘉奏魯臺候景書五
物之珍符恭惟太皇太后殿下陰教內敷坤儀四靜功
施宗社力保三朝之安尊極宮闈親承四海之養載履
景長之候益迎時暘之休妾等早荷慈憐幸塵近御屬
薦祥於令旦率會抃於柔悰

內中御侍已下賀皇太后冬節詞二道

妾等言伏以五緯連珠合太初之作歷一陽復筦首三

統以為元恭惟皇太后殿下坤載靜符天鍾慈度以輔
佐之德大陰教於先朝以擁全之功正母儀于當極屬
景長之嘉序宜神錫之多样妾等早邁盛期獲塵近侍
咸被至仁之覆靡勝羣抃之情

妾等言伏以清臺候歷輦推三統之元緹室飛灰潛應
一陽之動恭惟皇太后殿下天慈廣被坤道內寧尊臨
長樂之嚴已光於慈訓養極九州之富未盡于孝心適
迎至景之長宜擁來釐之固妾等夙逢昌會獲點近聯

荷仁覆之素深率抃情之靡既

內中御侍已下賀南郊禮畢詞

妾等言伏以玉筦升飴適履天元之旦紫營肇祀躬修
郊見之儀慶屬熙朝歡交浹寓鴻惟皇帝陛下體乾膺
命稽古凝猷振前代之濶文秩百神之遺饗臨裸怵惕
明發念親之懷欽紫配黎順成反物之報上靈昭答萬
祉來同妾等早被宸暉並參禁侍聞甫班於大號集羣
抃于柔臬

欽定四庫全書

華陽集卷十七

宋 王珪 撰

制詞

樂語

集英殿乾元節大燕教坊樂語

教坊致語

臣聞帝乘離火應赤符誕聖之期雲上需天啓祕殿示
慈之會橫九門之協氣沸萬玉之歡聲普祝睿齡樂逢
華旦伏惟皇帝陛下至仁天冒盛德日躋御堯屋以非

心降禹車而泣罪儲精峻廡安行帝道之常收視邃旒
坐照物情之隱妙玄功而不宰暢偉跡以無前適丁震
夙之期肇戒清和之候月維幾望風自南薰雲覆翠華
天臨煥幄拭玉來寶鄰之使充庭旅絕域之奇稱萬壽
之無疆歌太平之既醉七百年肇乎卜世自符周歷之
長八千歲始以為春更越莊椿之固臣等謬參法部獲
叩宸墀不度才孱敢進口號

口號

清蹕傳音紫禁來
逡巡萬玉擁鈞臺
南山鎮地符宸算
北斗傾霞入宴杯
鎬飲篇中魚演漾
虞韶聲裏鳳徘徊
年年赤帝乘離月
長見雲龍帳殿開

勾合曲

萬春介壽方稱漢
殿之觴百辟均歡
正協舜琴之曲宜
賡備奏參抃太和
上懌皇情教坊合曲

勾小兒隊

玉宇風微覺纖埃
之不動金徒漏緩
知瑞旭之初長堯

樽纔泛於九霞禹會正趨於萬玉宜詔髣髴之侶來陳
舞羽之容上悅天顏教坊小兒入隊

隊名

仙曲聞韶後童裳舞勺初

問小兒隊

祥鳳傾梧帝所殆非於人世恩魚泳藻皇慈遠浹於臣
心何緣青佩之羣得邁赤墀之地整鮮巾而昭爛儼長
袖以舒徐必有從來雍容敷奏

小兒致語

臣聞周雅萬年薦自天之時福堯封三祝感及物於君
仁適臨出震之辰爰紀乘離之月敞大庭而肆宴浹罄
宇以均休伏惟皇帝陛下握斗披元撫辰凝治雷霆孚
號一鼓舞於羣生雲漢睿章共昭回於上象納民福壽
措國盈成滯穗餘糧已溢農疇之望祥圖瑞牒弗停史
筆之書令也素魄將盈赤精甫燭感蒲魚之樂飲洽苹
鹿之歡心陋唐節之千秋或虧誦聖盡禹朝之萬國咸

走賓王同輸就日之誠共禱後天之算臣等佩臍弱齒
秉翟微蹤偶祇召於中宸願呈儀於丹祀進慙薄技仰
侑皇情未敢自專伏候進止

勾雜劇

蹁躑長袖適停逸綴之文曼衍都場未盡多歡之具宜
薦滑稽之戲以資愷樂之情徐韻宮商雜劇來歟

放小兒隊

舞茵徹繡暫收畫鼓之聲宴筵浮香漸轉綠槐之影歌

沛風而甫歌詠沂水以將歸再拜天階相將好去

勾女弟子隊

華簪拱極黼坐當陽幸天地之同符復君臣之共樂雖
喜天杯之泛未呈風袖之妍宜按籍於梨園俾薦歡於
鎬邑速進驚鴻之態來參翔鳳之儀上奏天顏兩軍女
弟子入隊

隊名

神樞標慶誕仙綴侑皇醮

問女弟子隊

帝幄天高人寰斗隔鷓鷯之羣下集魚龍之戲前陳何
巫山行雨之蹤肆洛浦凌波之步輒離雲島直叩天階
必有剖陳雍容敷奏

女弟子致語

妾聞少皞應符紀華渚流虹之異商王受命美皇穹降
鳥之祥偉上聖之挺生當南訖之肇序三靈擁祐諸福
叢休對蒸雲復旦之期廣湛露晞陽之渥著為盛節永

屬熙朝伏惟皇帝陛下躬攬乾綱心游地祕迪一祖二
宗之訓同三王五代之符偃然一函夏之歸坐以須大
昕之旦康功即底墜典交修內則文物盈廷躋聲華於
古治外則謳歌載路樂富庶於多方聿臨載誕之辰普
祝無疆之慶霑皇慈於鎬飲徹雷極以嵩呼北辰受衆
星之環長居紫禁南極觀老人之見永輔丕圖妾等謬
齒仙場幸逢聖旦願應鏗純之節痛陳蹈厲之容未敢
自專伏候進止

勾雜劇

天儀有穆星弁無譁顧宴筦之云周慮歡衿之未洽宜
薦邯鄲之笑以參平樂之嬉徐韻金絲雜劇來歟

放女弟子隊

肅肅都場九奏之仙韶終曲耿耿廣殿萬年之嘉樹移
陰蓬島路遐瑤池日晚徹繡茵而浪卷振綵袂以風翔
再拜天階相將好去

集英殿皇子降生大燕教坊樂語

教坊致語

伏以魯觀占雲適紀新陽之應震宮主鬯早開皇序之
祥况寶曆之逢熙復宸居之乘豫特頒廣燕用飾多驩
恭惟皇帝陛下德邁往初仁漸動植虎旂犀甲韜兵於
武庫之中桂海冰天獻賫於彤墀之下休符兆於君德
寒律變為春和淑嘉氣於神都列芳筵於祕殿下珍羣
之鷁鷺發和奏之笙鏞於時日上扶柔風生廣莫度芝
蓋於丹城降金輿於紫闈百獸感和率舞帝虞之樂羣

生遂性如登老氏之臺固已追平樂之勝遊掩栢梁之
高會臣謬參法部獲望清光靡揆才蕪敢進口號

口號

忽覺祥烟繞禁門寶慈宮裏見皇孫便令三洞張鈞樂
直許千官醉御樽未曉清風生殿閣經旬赤氣射乾坤
須知此會非常有遙看天顏一倍溫

勾合曲

露泛帝觴凝三微之協氣星聯朝弁燦初日之祥暉方

魚藻以均歡宜簫韶之合奏宸遊正洽樂節徐行上奉
天顏教坊合曲

勾小兒隊

燕觴飛羽方歌湛露之詩廣樂擬金已極鈞天之奏宜
命遊童之侶來陳舞佾之容上奉皇慈教坊小兒入隊
隊名

遊童春自舞儀鳳曉先鳴

問小兒隊

宸廷廣御仰侔太紫之躔鈞樂更和曲盡咸英之奏何處采髦之侶輒趨文陛之前必有所陳雍容敷奏

小兒致語

臣聞舜帝仁深衆極慕羶之樂周家德盛時歌在藻之娛屬紹美於皇圖早發祥於甲觀宜錫需雲之燕用均浹宇之歡恭惟皇帝陛下躬上主之資撫中天之運禮樂兼三王之備文章邁兩漢之隆矧乃武庫韜戈戎亭徹候百蠻奔走南踰銅鼓之鄉萬里謳謠西出玉關之

路今則陽生寶燭陰謝窮郊麗日重輪已應千齡之瑞
條風入律更萌萬物之華方玉笋之交飛復朱絃之遞
奏羣情大洽勝會難儔臣等雖在童髦嘗習舞干之妙
輒趨君陛願隨樂節之行未敢自專伏候進止

勾雜劇

華旌低影觀童舞之成文畫啟收聲識鈞音之終曲助
以優場之伎浹於燕席之歡上懌宸顏雜劇來歟

放小兒隊

銅壺遞箭屢移宮幄之陰鷺羽充庭久曳童髦之采既
闕韶音之奏難停舞綴之容再拜天階相將好去

勾女弟子隊

華簪照席再嚴百辟之趨寶幄更衣復覩中天之坐宜
度仙韶之曲更呈舞袖之妍上奉皇慈兩軍女弟子入
隊

隊名

玉調歌管脆雪入舞腰輕

問女弟子隊

金徒緩箭延麗日於壺中翠羽飛觴醉流霞於天上何
仙姿之綽約叩丹陛以踟躕須有剖陳近前敷奏

女弟子致語

伏以位符蒼震屬元子之膺祥歌起盛周見羣臣之合
好矧萬幾之多豫誠千載之一時共樂熙辰用恢勝矩
恭惟皇帝陛下嚮明紫極儲思巖廊邁三皇五帝之風
繼一祖四宗之烈候亭相屬不齎萬里之糧年廩屢登

又美曾孫之稼時及新陽之復早逢重日之暉廣慈惠
於前王慶休華於茲旦玉觴盈醴均流湛露之恩翠簾
鳴鐘合奏洞庭之曲帝所之歡未極壺中之景初長妾
等幸邁盛期獲塵法部側聽鈞音之節來參妙舞之容
未敢自專伏候進止

勾雜劇

鸞拂宮茵極七盤之妙舞鳳儀仙曲終九奏之和聲方
鎬飲之窮歡宜秦優之進技宸顏是奉雜劇來歟

放女弟子隊

宮花剪綵恍疑天上之春海日銜規忽覺人間之暮宜
整羽衣之綴却還蓬島之遊再拜彤庭相將好去

集英殿秋燕教坊樂語

教坊致語

伏以堯野登年化民雍於萬國鎬京流飲徧君樂於羣
臣候屬良時事歸華旦宜皇居之肆會罄率土以均休
恭惟皇帝陛下受命當天右文嚮道比屋盡可封之俗

三邊無不諫之民干戈包載於虎皮劒戟鑄成於農器
承顏長樂邁舜孝之蒸蒸布政明堂迪文心之翼翼今
則場功告畢國步承平霜清桂苑之塵日上龍樓之影
轉丹蹕於蘭路下凋輿於玉庭金奏颺於天風羽觴飛
於帝座張樂洞庭之野未盡勝遊置酒顥天之臺徒夸
妙戲豈如聖日常奉皇歡臣等謬處伶坊獲趨禁所敢
呈口號上浼天聽

口號

秋光紫翠動南山天上傳呼御燕頒一部梨園吹鳳曲
九重丹闕對龍顏日華初駐金輿仗霞彩猶浮玉笋班
欲識君臣同樂處萬箱登歲五兵閒

勾合曲

金風日爽方登萬寶之秋黼座天臨適啟三山之宴宜
按紫雲之奏佇觀丹鳳之儀上悅宸顏教坊合曲

勾小兒隊

簫韶迭奏自通天地之和日月同華方協君臣之樂倘

八佾之舞行不進則四方之治象何觀徐韻宮商教坊
小兒入隊

隊名

風雲歌沛水金石會虞庭

問小兒隊

鏘然九奏合於丹陛之前髡彼兩髦來自絳帷之下既
動容而獻技宜緩頰以興辭進步前來分明敷奏

小兒致語

伏以游魚戲藻逢鎬飲之多娛舞獸儀庭感舜韶之新
曲茲為勝會允屬熙辰恭惟皇帝陛下紹五聖之闋休
對兩儀之鴻施仁風翔於月窟聲教燭於冰天物生阜
蕃民氣清靜靈臺偃白玉闕無夜柝之虞儒館獻歌槐
市有夏絃之樂屬萬幾之豐豫會百辟以均歡清醕交
傾大庖旅進樂遊未已恍若壺中之觀盛事難名殆匪
人間所有臣等幼陶皇化早隸仙坊每戲康衢已嘗聽
於雅奏進瞻法座更願奉於宸顏未敢自專伏候進止

勾雜劇

疊鼓凝簫已聽鏗鈞之奏
綵衣振服未窮要妙之觀
宜命仙優上承帝悅
金絲重韻雜劇來歟

放小兒隊

楓宸影轉花漏聲遲
御醕飛觴已奉鈞臺之享
童衣妝綵却還沂水之遊
再拜彤墀相將好去

勾女弟子隊

羽帳重披降烟燼之瑞氣
玉觴再舉導宛轉之和聲
百

禮交修羣臣俱醉正皇歡之霑洽宜妙技之翩躚徐韻
清商兩軍女弟子入隊

隊名

舞隨驚燕起歌落貫珠圓

問女弟子隊

翠髻縹緲疑綵鳳之相將紅袖翩翩訝驚鴻之欲舉想
是蓬山之侶來同瑤水之遊必有敘陳分明敷奏

女弟子致語

妾聞朝野多歡游豫為諸侯之度君臣同德燕樂慰嘉
賓之心矧屬昌期具稽前美恭惟皇帝陛下功逾禹儉
德邁堯聰發號令於風霆炳文章於日月朱干偃武自
弭怨於西夷玉檢登封竚告成於東岱於時肅霜凝氣
流火沈光瞻黼帳之洞開命瑤觴而迭進仙徒緩箭宮
綵飛花聖日舒長助宸遊之多暇人心和樂感韶奏之
新聲固以掩高會於栢梁軼勝遊於平樂妾等逢辰有
幸執技非工暫拂塵衣來造塗丹之地仰瞻法座願呈

迴雪之容未敢自專伏候進止

勾雜劇

萬樂高張既侑需雲之會羣臣俱醉齊霑湛露之恩方
暫戢於舞容宜載陳於優戲天顏是奉雜劇來歟

放女弟子隊

金壺遞箭潛移寶晷之光玉笋飛筵屢極鈞音之奏宜
整五雲之馭却陪三洞之遊再拜天階相將好去

錫慶院罷散同天節道場女弟子兩日遂名

九日

舞隨儀鳳舉歌落貫珠圓

十日

瑞感虹流渚歌隨雪遶衣

欽定四庫全書

華陽集卷十八

宋 王珪 撰

制詞 詔

賜樞密副使吳奎生日禮物詔二道

勅維時仲夏氣盛南訛乃生上賢謀經右府載厯祥弧
之序方隆政路之咨有腆于頒庶綏多福

勅炎煒乘候允執帝衡景緯儲精實生邦輔方倚政塗
之望特推賜式之優既俾壽臧且殊眷遇

賜樞密副使歐陽修生日禮物詔

勅卿進由辭宗筦於機政屬乘離之杪候懷生甫之初
辰馳遣使軺往暨私館將牽醪之盛錫明楹宇之叢禧
其於邇聯不曰厚遇

賜樞密副使胡宿生日禮物詔

勅經物應才擁樞尊命涼薦仲秋之籥慶垂左戶之弧
嘉辰協期異數將寵爰優近輔蓋有舊章

賜樞密使富弼生日禮物詔

勅四氣復元太和滋物時正上春之籥祥開左戶之弧
稟天至情佐國休運受邦之錫既碩且多膺歲之釐宜
昌而大

賜夏國主生日禮物詔四道

詔夏國主保有世封善歸時貢西郊展輅迎氣始清左
戶垂弧紀祥初誕爰頒寵幣往續茂齡今差某官賜生
日禮物具如別錄至可領也

詔夏國主素律凝商涼颺應物載紀左弧之慶善承西

土之封使得先期朝頌有匪式將恩禮以續壽祺

詔夏國主善述世忠懋修邦貢素商始序嘉誕協辰爰
飭使軺往頒朝幣續爾壽祉體予睠懷

詔夏國主嗣守世封善歸時貢屬祁寒之薦候嘉誕日
之開祥俾夙致于寵頒庶務迎于嘉祉宜欽禮遇益紹
忠勤

賜樞密使文彥博赴闕詔

勅宥密之府總樞機之萬微輔弼之臣合股肱之一體

適圖庸于碩望佇進翼于丕謀宜遂邁歸式欽厚遇已
降制命除授卿依前檢校太師兼侍中潞國公充樞密
使淮南節度使詔到日卿可交割職分公事與轉運使
一員兼權管勾訖乘遞馬發來赴闕

賜夏國主乞早頒封冊允詔

詔夏國主比輸忠款願襲世榮已飭牧司式備封冊屬
使人之勤請欲誓詔之早頒庶彼邊民聞我朝命得遂
耕耘之便更無兵革之虞所宜允從當體睦遇今差某

官先齋誓詔往彼至可領也

賜使相知相州宋庠加恩誥詔

勅夫祭有大澤則惠必及下惠均則政行矣維君子之能祭也朕禮成明堂福不敢專思與一二舊政之臣以共享之乃己未大昕告于外庭蓋所以迹靈況之來錄德褒功賞不可稽雖爾身在外乃心罔不在王室其往欽哉以對越上帝之寵今差卿男尚書屯田員外郎充國使往賜卿加恩官告勅牒到可祇受

賜淮康軍節度使知曹州張茂實加恩告勅詔
勅朕以季秋之良薦至精于上帝又以萬國之歡心以
事于我文考神明感通物有匪召而至者蓋叢厥祥朕
既舉大澤以被于溥天之下矧于虎臣嘗有夙夜之勞
乎往承其休以敷我告廷之命令差人往彼賜卿加恩
官告勅牒到可祇受

賜西蕃邈川首領保順軍節度洮州管內觀察
處置押蕃落等使董戩依前官照例支請俸詔

勅董戩時推僑畧世濟茂勲方崇建于高牙且紹綏于
舊土宜優原祿之給以寵封疆之勞其體注懷毋忘欽
荷

賜使相宋庠生日禮物詔

勅河嶽之靈發為異稟廊廟之望稔于老謀履四氣之
首和紀左弧之夙慶餼牽維碩醪酒維清以介壽祺以
將禮遇

賜樞密副使包拯生日禮物詔

勅卿抱峻清之節濟沉遠之謀眷秉軸於宏廷省夢熊
之嘉月方寵政塗之望特將私館之頒續爾壽祺昭予
禮遇

賜樞密副使孫抃生日禮物詔

勅卿雅縕賢謀進陪機論履肅霜之素序記射矢之初
辰宜有寵頒以迎壽祉益懷忠蓋庸副眷毗

賜參知政事趙槩生日禮物詔

勅維時上冬氣應寒苦是生良輔允迪化均稟粹者絕

其倫數隆則蕃以錫載臨嘉序益俾多祥

賜宰臣韓琦生日禮物詔

勅韓琦氣肇商颺景臨辰刻爰設在弧之慶是生上衮
之賢頌異數于朝彛集嘉祥於族燕俾介眉壽長毗化
元令賜卿生日羊酒米麵等具如別錄至可領也故茲
詔示想宜知悉

賜樞密使文彥博生日禮物詔三道

勅夙駕鋒車已竚執圭之覲來咨籌幄適繫借筋之謀

迎寒律於上冬紀誕祥于左戶爰將賜式庸示寵懷
勅高門發慶良月就盈眷秉軸之上賢紀垂弧之吉序
將賜儀于內府助嘉席于私庭用輯蕃釐蓋優碩輔
勅歲功甫就冬令載新鍾賢德于高門筦神樞于右府
夙厚四隣之遇特馳三閣之頒庶助蕃休共閔丕化
賜契丹皇帝賀乾元節大使茶藥詔

勅卿隰轡馳華國函通睦言慶誕辰之會初離炎律之
煩往致匪頒就申暍勞

賜賀乾元節副使茶藥詔

勅卿榮貳使軺肅持邦幣祥紀乘離之日聘來于隰之
華推錫上臺慰勤中道

賜契丹皇太后賀乾元節大使茶藥詔

勅卿通歡隣契修慶誕期俯夏籥之御辰嘉使旃之勤
命用持邦錫以輔時休

賜賀乾元節副使茶藥詔

勅卿參膺邦選紹睦隣音紀電照之初期念星馳之夙

駕俾爰嘉賚庸導撫懷

賜賀正旦副使茶藥詔

勅卿肅陪使指參講隣歡驅馳原隰之長偃薄風霜之厲宜申邦賚以厚賓儀

賜契丹皇帝賀正旦大使茶藥詔

勅卿舉循使範來締隣歡載馳川陸之遙適冒風霜之勁上奩均錫征馭紓勞

賜賀正旦副使茶藥詔

勅卿夙貳使車甫臨中道正涉風霜之厲靡勝原隰之
勞持示匪頌用將曠遇

賜賀正旦副使茶藥詔

勅卿夙戒使軺遠將隣幣適冒霜威之厲載馳川路之
長申念多厪特蕃嘉錫

賜樞密使富弼乞假將治允詔

勅卿履上樞之位制萬里之衝謀經旭卉而合大和命
出幾微而濟大務比爽晦明之裕寢還體力之強予心

未孚其請不已且天道之遠豈術數之能窮而賢德之
充自神明之來相茂凝精粹欽遲儀形宜依所乞予假
將治

賜樞密副使歐陽修免恩命允詔

勅朕鄉疇雋望入贊宏文帷幄之言每進規于不逮尊
俎之畫或折難于未形會參政本之司進服地官之序
亟露衷于宸几願回渥於制函蓋君子圖德業之隆惟
賢者戒寵祿之至雖爾躬之攸勉復羣論之咸休庸遂

乃誠往安厥位所讓宜允

賜婉容周氏免恩命不允詔

勅周氏省所再上表今月一日蒙聖恩降詔書一道不允臣妾辭乞婉容者竊以婉容之位當選於柔良乞于嬪御之間別圖于授受實乃心之至願冀維睿之矜從陳乞事具悉朕飭朝廷之化慎帷房之選進登九御之列參播後宮之範維爾有儀以淑有德以恭方內治之旌賢乃繫章而避寵彤音維美紫渙難留所乞宜不允

賜宰臣富弼乞退不允手詔

省所上劄子奏乞退事具悉朕思帝虞之朝臯夔輔德
始終一心以垂休于無窮豈有輕去其位而圖處身之
佚哉惟卿負大材於天下相予五年克勤于王家今方
講太平之務忽以告辭豈朕之不明而廢厥謀將讒邪
害正而廟廊之論難施歟否則卿何疑焉朕固灑然注
意於卿卿之自視下為士民之所信愛是宜秉節不顧
畢慮于有為之時也爾尚宅乃事無俾臯夔之專美有

虞所乞宜不允付富弼

賜參知政事孫抃趙槩免恩命允詔

勅朕設爵賦祿所以待天下材賢魁壘之士矧秉國政
事之臣豈復積日參久而議遷也今二府更進例有增
秩之寵乃露言予聞至于懇激夫在上位者知所以難
進因可以下厲士大夫之風朕何拒焉往綏厥服以永
享其休名所乞宜允

賜前樞密副使吳奎辭特支請俸允詔

勅卿鄉離家難遽去朝位苴麻之飾靡奪至情祿稍之
頒未為異數露言何確援比是辭既嘉孝慕之終敢累
廉規之守所乞宜允

賜三司使韓絳乞外郡不允詔

勅惟三司總天下之計而正使亞二府之列故事劇則
慎所任秩重則難其退方倚心術之裕以制邦用之廣
忽辭以疾有拂予聞姑勉嗇于至和終蒙濟于丕利所
乞宜不允

賜端明殿學士知成都府韓絳乞內郡不允詔
勅井絡之區其地阻而俗蕃常擇通材篤望之臣以鎮
守之方春發生朕哀遠民之失職卿乃求徙內郡豈稱
所以宣布德澤之望乎矧卿精力素強果於臨事忽茲
引疾良佛子聞所乞宜不允

賜知潞州李東之乞西京留臺不允詔

勅壺關控太原之道亦朕股肱郡也卿以儒雅進而達
于世務之宜故出為郡守流于美聲近歲以來何恙不

已夫退領閒務曷若臨政惠民之深其專精神近醫藥
以自扶持憲臺別印非朕惜之所乞宜不允

賜武成軍節度使知鄆州李璋免南郊加恩第
一表不允詔

勅朕卜歲習吉大旅于郊三靈顧歆敢曰能饗維時內
外咸致厥勤承神之釐肆為休命其往欽受毋重以辭
所乞宜不允

賜李璋免恩命不允詔

勅朕踐祚之始澤及四遐矧子親賢守在藩寄豈無褒寵庸答爾勞毋或固辭以格成命所辭宜不允

賜翰林侍讀學士知鄧州賈黯免恩命不允詔勅卿器遠識冲行端文富早冠辭科之選亟參法從之游自終制于喪廬屢請分于郡契朕惟金華隆于講席南陽寵于故鄉矧道足以備朝夕之咨望足以鎮江漢之俗奚煩露牘更就徒麾毋循小嫌姑從素欲所乞宜不允

賜翰林學士歐陽修脩唐書成免恩命不允詔
勅朕惟唐有天下三百年迹其所以廢興之由厥監未
遠及觀書史之文則煩而靡要是非頗謬于所聞頃因
命官更纂其本末十有七年而后書成然非卿筆削之
則莫能示法于將來今例遷一秩猶未足酬歲月之勞
刻章以陳良為曲讓所辭宜不允

賜翰林學士歐陽修乞洪州不允詔

勅昔漢蕭望之雅意在本朝不欲遠為郡守誠自以議

論有益于時不忘愛君之義也卿學通古今明于治亂之原朕常所咨訪者也學士之職可謂地近而責清矣何感而上書願請南昌之符雖近于故鄉而豈不去國之遠乎茲於朕非所以見愛也況秉德以寧視聽不衰其安于位以永享其休名所乞宜不允

賜樞密副使邵亢乞外郡第一劄子不允詔

勅夫廊廟之上日計國之安危者惟是一二執政之臣矧卿從朕東朝用以不次而處之不疑孰施而弗可乎

且士常患不得其位與時故不能盡其材今卿時逢而位著矣不進與朕共圖天下務而乃引疾自言思鄉郡而去歸之豈朕腹心之望焉所乞宜不允

賜邵亢乞外郡第二劄子不允詔

勅朕惟自昔攀附之臣固多發忠憤蒙爵位以取一時之榮豈不偉哉卿早以德義傳朕而預政未幾奚為數陳筋力之不強視聽之不明而欲以去朕也且為國之道在篤於任賢而不可移詩云我心匪石不可轉也今

進未踰年而遽去之不亦使朕得轉石之譏乎其安于位毋人言之是恤也所乞宜不允

賜定國軍節度使李端愿乞致仕不允詔

勅御獻穆之子神德之孫生長富貴而不自矜出入忠義而無所顧何意屬疾稍潤便朝之咨奚為上書欲還膺鉞之寵矜復神明之觀來將著定之儀謝事之文母煩糸布所乞宜不允

賜判定州李昭亮乞宮觀及移郡不允詔

勅夫大河以北蓋天下襟喉之地而總帥之臣可易屬
哉卿以勲戚之舊履將相之貴更歷中外輸勤一心何
感而上書願解邊劇以自適豈朕所以屬老成之意邪
且年隆而知愈深寵至者倚彌重宜安乃服以永時之
休名所乞宜不允

賜樞密副使陳升之免恩命劄子不允詔

勅朕惟本兵之司安危所繫執政之任賢峻是圖適咨
僉論之同允謂至公之進亟參宥畫宜畧搆文所乞宜

不允

賜端明殿學士知定州張方平免恩命乞侍養

不允詔

勅朕惟河北天下之根本也況中山之道兵衆而民蕃
可謂重寄矣顧非敏謀篤望之臣未易遣之夫春秋之
誼不以家事辭王事卿何辭焉所乞宜不允令使受勅
告疾速發赴本任

賜翰林學士承旨宋祁免恩命不允詔

勅卿早以瓌材延于近侍荐屈使符之守居懷辭橐之英宜還與于禁游且進承于密旨況智畧足以經國論文章足以鬯帝謨奚為露章乃至引疾方圖朝夕之訪勉近醫藥之良毋執沖懷即祇嘉命所乞宜不允

賜端明殿學士知鄭州宋祁修唐書成免恩命
不允詔

勅朕惟唐室之興耳目之所接者未遠觀劉氏所著舊史秉筆于倉卒之際使當時君臣事業鬱而靡彰朕其

悼馬頃詔文學之臣更纂其異同比上送觀蓋有十七
年之功緒雖卿奉職于外然采集放失之聞考之行事
以論次一代之典顧積厥勤左轄之司名秩雖重然亦
出於例遷之恩爾卿何辭焉且伏奏之日嘆于滯留朕
亦懷卿之耿耿也所乞宜不允

賜樞密副使陳升之生日禮物詔

勅陽重表節嶽峻基神紀蓬矢之誕祥將緜函之私式
洪圖是翼茂祉其膺

賜陝西宣撫使韓絳湯藥詔

勅敵侵興祆重我邊陲之擾戎車飭駕蒙于霜露之勞
維經制之有方固旋歸之匪日特頒靈劑用輔沖襟

賜樞密副使吳奎免恩命第一劄子不允詔

勅卿才為衆推資與時會鄉從大冊之對寢履近途之
縣嘗感慨以進規亦周旋於試劇適資峻德升筦宥司
圖前筋之勝謀導北樞之密令奚為上牘乃覬還恩往
肅以承勿封于執所辭宜不允

賜吳奎免恩命第二劄子不允詔

勅夫廊廟幹于化原帷幄籌以幾事朕之慎所出令難於用人以卿曩與訪聞之求屢陳忠讜之益才試浩穰之決謀登宥密之咨蓋稽衆之雋名豈彙資于大任何繼騰于讓牘欲深避于寵途且為國澤民則義有所重之顧因賢子祿則誠無未安之疑起即被于制綸往參熙于神務尚虛爾位有壽予聞所乞宜不允

賜吳奎免恩命第三劄子不允詔

天子惟君萬邦建時百辟以祇迪于乃事矧曰左右
之臣以朝夕承乂乃辟子敢有弗欽爾克懋乃猷茲庸
命爾圖厥政爾乃陳所以固辭朕命者三朕思有虞之
世羣臣皆讓亦莫安厥位終勅之曰俞汝往哉爾弗遜
聞于前人其率時訓惟厥中嗚呼慎爾止毋倚乃身乃
罔弗孚于休所辭宜不允

賜起復樞密副使吳奎免恩命第二表不允詔
勅夫天下之喪雖乃達禮門外之治蓋有斷恩故移君

以忠者孝之隆合世之變者權之大卿自離家難奄隔
歲華思舊人之復來已深詔之屢下義形憂國矧多金
革之虞哀極思親不在苴麻之飾審從明分其起輔予
所乞宜不允

賜判大名府韓琦乞移徐州不允詔

勅卿頃去鼎司出均藩寄自易官符之守良紆邊瑣之
憂殊隣輯寧屬境恬豫適還四路之劇且閔舊臣之勞
何煩纍章更欲徙郡夫慮周者在予體國忠至者不以

狗身勉奮精神之和奚止翰垣之倚所乞宜不允

賜宰臣韓琦不赴文德殿立班待罪不允手詔
天子之御正朝久而未講宰相之班百辟後亦從隳檻
臺簡之忽陳規邦彛之浸畧蓋延英賜對每踰中昃之
咨故宣政留班不及大昕之謁矧在職之匪懈奚引愆
而靡寧宜斥細嫌用綏素矚所待罪宜不允仍斷來章
賜宰臣曾公亮不赴文德殿立班待罪不允手

詔

省所兩上表具悉路朝之制雖著常班憲府之文蓋繩
墜矩矱在秉鈞之地日度辨色之趨事有從宜初非不
恪奚露章之亟及乃引責而自深載披所陳良拂予聽
所待罪宜不允仍斷來章

賜翰林學士尚書兵部員外郎知制誥吳奎乞
知青州不允詔

卿強學博覽足以通古今嘉謀讜言足以承顧問朝夕
獻納余有望焉矧方委之劇煩嬰以事任懋乃賢業宜

有施於朝廷奮乎壯猷豈暇便於鄉里其安爾職深體
眷懷所乞宜不允

賜宣徽南院使判延州程戡免恩命不允詔

勅卿氣尚方嚴才資肅給歷職二府輸勞六年調以風
教之馱底於疆陲之靖比願還於幾柄甫來侍於經帷
有懷前謀殊屈大用會更西帥之律進陟內徽之廷朕
倚則深汝辭毋再所乞宜不允

賜皇后曹氏答詔

朕以既秋之良大饗于帝筮鏞純澤璧玉華光肆禮禮以迄成繫坤儀之參助遽披嘉牘申布慶辭載咏謙兢良深悲嘆

賜沂國公主等答詔

勅沂國公主等毓粹仙源鍾慈皇室屬帝裡之具舉甫神貺之下凝彩衛初回芳函忽旣柔心昭美終食興褒
賜越國長公主等答詔

勅越國長公主德茂穠華榮均寶系屬熙成於郊旅甫

丕集於神祺適迓齋園遽馳慶牘載循惠意徒極褒懷
賜婕妤俞氏等答詔

勅婕妤俞氏早以柔嫺班于禁嚴屬成宗祀之儀具錫
博臨之福適回清蹕遽遣慶章載體祇勤豈忘褒尚

賜貴妃沈氏答詔

勅貴妃沈氏朕躬臨泰時祇薦嘉牲仰格上靈之歡還
孚萬有之澤睠三朝之舊德乘大呂之嘉辰叙慶騰章
興褒起席

賜宰臣曾公亮已下議宗室封爵不當待罪特
放手詔

省所上表具悉朕惇骨肉之親封爵之典而有司失于
博考于令乖乎適從既推義之所安自疏恩之唯允矧
總裁于大政誠日委于繁機宜寬引咎之文姑體遇賢
之意所待罪特放付公亮已下

欽定四庫全書

集部

華陽集卷

十九至
二十一

詳校官庶吉士_臣李如筠

檢討_臣何思鈞覆勘

謄錄監生_臣溫廷鑑

謄錄監生_臣朱起鳳

謄錄監生_臣曾照

欽定四庫全書

華陽集卷十九

宋 王珪 撰

制詞詔

賜夏國主給還綏州誓詔

省所奏表具悉朕紹承天命盡四海而撫懷之况爾世
守西土為國藩輔者乎今復懲既往之非篤自新之志
質於天地要之鬼神載貢誓文納忠王室朕方推大信
以示萬邦俯同茲言永無有易其進納塞門安遠二寨

已指揮延州候交割訖却給還綏州各依舊界仍自行封冊已後歲賜並無舊例其餘約束事節一依慶歷五年正月二十二日誓詔施行朕已戒勅邊吏各守封疆所宜顯諭國人藏書祖廟永保休福詒諸子孫指辭已孚故不多及

賜夏國主乞用漢儀詔

詔夏國主省所奏昨因宥州申覆稱迎接朝廷使命館宇隘陋軒檻阨危儻不重修誠為慢易於是鳩集材用

草故昂新來年七月臣生日用藩禮館接使命十月中
冬用漢儀迎接事具悉使傳之馳為規固久候亭之陋
能飾而新既肩世服之忠又樂邦儀之慕忽披來牘具
體迺誠如用漢儀只依昨來張宗義所行儀式次第餘
並依誓詔

賜夏國主不還綏州詔

省所奏事具悉朕嗣膺丕歷勤撫庶邦凡德澤之所加
固邇遐之無間矧惟西夏屏於一方比載覽於誓文尋

俯同於誠請逮按還於舊境忽并述於異端因念二寨之民豈無故俗之戀使各安其生聚且曲示於仁恩蓋狗彼情匪樂生事重披來奏尚有所陳宜自斥於末圖庶共恢於遠畧向多囉中錦等齎到誓表備詳恭順既降誓詔遂令延州交割塞門安遠訖却還綏州並須各依舊界及得延州奏夏國差人來只要交割寨基比移牒宥州指說舊日界至回牒却稱趙高妄有指執顯是不依舊誓詔交割舊界朝廷務敦大體特示涵容其二

寨已令延州更不交割綏州固無給還之理自今所宜
遵守誓詔永保安靜無令任事首領輒起事端

賜夏國主為行冊禮詔

詔夏國主茲閱函封重申誓約本誠心之自篤為封守
之遠圖朕已飭使人將馳冊禮既荐綏於世土宜先諭
於邊氓庶遂畊耘之私永無兵革之患緬惟忠順當體
眷勤

賜夏國主令遵守藩儀詔

詔夏國主朝廷戢兵所以息民施德所以懷遠顧西夏之封守奉累朝之詔書不意近歲以來繼有無名之舉邊隅多擾生聚靡寧乃至去秋忽迫大順雖云報仇於熟戶實亦拒戰於官軍皆謂已萌之情可見不順之迹先皇帝終務全於國體且往詰其事端洎朕纂承之初尤思撫御之畧載覽來章之述有嘉大義之存矧舊載於宗盟當復躬於忠訓宜念祖先之服益遵藩翰之儀使永無兵革之虞衆遂耕耘之樂自享多福以傳無窮

詔夏國主乞贖大藏經詔

詔夏國主省所奏請贖佛經一大藏籤牌經帙等欲乞
特降睿旨印造靈文以俟至時幸垂給賜所有舊例紙
墨工直馬七十匹續具進上以聞事具悉大雄流教善
利無方信土篤緣羣迷釋趣喜觀心於法境願繹理於
祕文載省控陳所宜開允其請贖經文已指揮印經院
印造候嘉祐十一年正旦人到闕給付

賜夏國主乞工匠詔

詔夏國主省所奏蓋以番文素稀工巧變革衣冠之度
全由製造之功欲就考工聊倩庶匠以聞事具悉紹固
世封述修邦貢率我朝廷之化時迺祖父之規遽閱來
章蓋無前比宜敦爾守難徇所陳自西平王以來無此
陳請且宜循守舊規

賜夏國主今後表章如舊制稱賜姓詔

詔夏國主上旻降禍萬國纏哀恭馳遣使肅申慰禮情
雖深於永慕事或易於舊聞維乃祖之稱藩有先朝之

賜姓撫綏隆於君義親愛篤於人倫自再納於誓言亦具循於軌式忽形需奏靡固宗盟言念舉錯之違得非左右之惑宜存遠慮用迪前猷今後所上表章宜却如舊

賜韓絳御寒衣服詔

勅韓絳比將使指出護邊虞屬歲景之嚮窮冒闕程之正邈埃塵薄于四野雨雪犯于重裘適懷征鞅之勤特解御衣之賜寵知加厚報欲圖深

賜夏國主中冬時服詔四道

詔夏國主愛景流空寒威厲物緬念西垂之守嗣推累世之忠飭使驛之于行頒冬裘之載煥益肩順節永報恩華今差某官賜中冬時服具如別錄至可領也

賜夏國主農入場功虞歸澤賦逖念西陲之守肇迎北陸之寒馳遣使軺往頒恩篚既安且吉宜厲而忠

詔夏國主紹封西土述貢中邦眷塞路之阻遐方寒威之率厲爰命乘軺之使特頒在笥之衣茲示寵私以褒

忠嚮

詔夏國主趨遵朝矩慎守世封顧迅晷之易遷屬寒風
之又至特命乘輅之使往頒在筭之衣尚體眷勤益昭
忠瘁

賜夏國主乞買物詔

詔夏國主省所奏買僕頭帽子并紅鞞腰帶襯等物件
乞從今後凡有買賣特降指揮無令艱阻以聞事具悉
善纂前修遯守西土通奏函於信介易服用于上都體

乃馳誠勤于嚮化特從俞允用洽賧私已令管勾都亭
西驛所依例收買應付

賜忠武軍節度使知河陽梁適避祖諱免恩命
不允詔

勅國家優東政之舊則禮莫與盛疇撫邊之勞則寵易
為豐眷大鹵之夙勤請三城之荐治加視上司之秩進
疏舊許之封渙命班於大昕羣謀合於遠慮初聆制檢
之暨遽達讓函之來復推忠武之避雖遠嘉於美志然

終答於成勳其往肅承以昭欽倚所乞宜不允

賜梁適乞換文資不允詔

勅卿早以傑材固嘗陪予廟堂之論矣今稍櫻疾疢遽欲遷上忠武之節豈朕所以遇大臣之體哉矧河橋近藩非有邊瑣之虞其專精神近醫藥以自扶持詩不云乎樂只君子遐不眉壽其庶矣夫所乞宜不允

賜知兗州梁適乞致仕不允詔

勅卿蚤繇碩望嘗又近司逮紹履於至尊頗更臨於外

服畫帔未接時論無虧奚系疏於衰侵乃固斷於謝去
蹈仲尼之訓雖高易退之懷聞傳說之書尤重有終之
戒往安攸處毋拂予衷所乞宜不允

賜判延州程戡乞致仕第一表不允詔

勅卿昔嘗陪予議政于巖廊之上今年耆而德隆朕益
所加遇者也矧延川一道臨蕃戶之吭實賴卿鎮撫之
何疑而上守邊之印以歸是薄朕忘舊故之臣而期以
自高也惟強餐持神遠思疆事雖未能圖玉闕之復固

已寬予西顧之憂所乞宜不允

賜程戡乞致仕第二表不允詔

勅卿向解政機即臨邊瑣隱然自重鬯國威於無垠折
其未形有廟勝之前畧肆予纂緒屢以引年如聞風力
之彊足扞疆陲之事念綏遠俗終倚壯猷所乞宜不允
賜程戡乞致仕第三劄子不允詔

勅延為靈夏之吭而比年以來羗人弗諷數擾我邊氓
方飭兵重屯以講廟勝之冊而卿總制在延為日蓋久

實賴威名以鎮守之乃數上書願還官職之事豈朕所望所乞宜不允

賜觀文殿大學士龐籍乞致仕第一表不允詔
勅朕聞唐虞之朝君臣上下秉心一德烏為間言之所移我是以聖賢始終榮華至今流問無窮卿稱冒丕德嘗股肱于予躬雖爾身在外廼心無不在王室朕方咨于老成遠思二帝之治乃據經引年願上印鞞以歸豈所望焉卿其輔養精神毋追高一時以遺愛君及民之

義爾尚宅爾常以永邦之茂命所乞宜不允

賜龐籍乞致仕第二表不允詔

勅夫禮高年尊有德三代之所以起治興道也矧嘗與朕共圖天下事而時所謂元老之臣朕敢輕其進退哉卿頃實相予秉義忠一勤勞夙夜厥功茂焉何感而上書願乞骸以歸者至於拳拳况今靡摠以官職之累其安以奉朝謹謀嘉猷旬以告朕之不逮若遺榮之事則所未聞所乞宜不允

賜觀文殿學士程戡乞致仕不允詔

勅夫士之難進則風節厲國之上賢則名器尊蓋有主
耳以至忘身老而不得謝事卿識量閎粹材謀敏彊與
政七年盡忠一德迺援經辭寵抗牘露表豈陟降之厭
勞抑讒訾之惡直今以陪紳祕殿侍橐禁林且事佚而
道益冲地清而責靡至猶執謙挹以靳退休雖懷拂世
之高恐負優賢之望勉祗予渥難徇爾陳所乞宜不允
賜龍圖閣直學士知成都府趙抃治迹尤異獎

諭詔

勅蜀遠在西南最要郡也朕患吏不能究宣德澤以被於遠民故其擇守非慈良簡重者不以命之卿在蜀甫踰年而使者以其治迹尤異上於朝廷夫吏所以治民也能盡其治而民賴之豈不嘉汝乎

賜康州防禦使竇舜卿等賀皇太后皇后授冊
進馬詔

勅朕鄉緣初郊畢講巨禮眷肅膺於寵寄遽列上於慶

儀言念秬勤豈忘嘆矚

賜河陽三城節度使同中書門下平章事文彥
博謝裕享加恩進馬詔

勅朕屬者涓辰上冬合祭太廟維明靈之顧德首詰輔
以均禧阻覲丹庭馳蹤逸轡傾輸之至嗟美不忘

賜宣徽北院使知應天府王拱辰到任謝恩進
馬詔

勅卿蚤班徽省出保留京念飭駕以于行方頒條之在

始特驚上閑之貢且修列鎮之儀載循忠輸靡忘褒矚
賜端明殿學士禮部侍郎錢明逸轉官謝恩進

馬詔

勅卿進繇大冊名在禁聯比更邊閩之符升貳禮卿之
秩馳丹忠於魏闕貢逸馭於星閑載亮爾勤良深予嘆
賜四方館使知相州曹偕賀南郊進馬詔

勅卿載勳之後奉寄於藩屬慶典之丕施飭貢儀而首
及飛函表順置几盈褒

賜虔州觀察使劉渙賀祿享進馬詔

勅迺者孟冬之良合食太廟逮迎至景休氣荐臻輸駿
上閑形於慶贖遵修朝矩有尚予懷

賜賈昌朝文彥博宋庠李昭亮程戡各進乾元
節上壽金酒器并馬詔

勅卿中留廟畫外布藩條罄輸忠瘁之深申祝壽祺之
茂金陳御府驥驚天閑參具貢章足形嘉惠

欽定四庫全書

華陽集卷二十

宋 王珪 撰

制詞 詔

賜保平軍節度使兼侍中賈昌朝謝明堂加恩
進馬詔

勅曠禮之行載涓宗祀靈釐之委首錫輔臣方膺制檢
之頒遽閱貢函之上重惟祗嚮屢集嘆休

賜鎮安軍節度使兼侍中賈昌朝謝袷享加恩

進馬詔

勅卿業楸中階寄隆近屏屬太祠之峻事眷舊德以均
登乃選上馳以將來續載惟傾嚮良用嘆嘉

賜宣徽南院使程戡謝恩進馬詔

勅卿輟自內徽頒非常數方倚綬於絕塞首飭貢於上
閑載省需章有嘉勤節

賜武成軍節度使知陳州李璋南郊謝恩進馬

詔

勅朕比者謁款上圓布釐羣位眷茂膺於藩寄爰飭上
於貢儀檻贖知勤撫懷增嘆

賜定國軍節度使梁適賀冬至進馬詔

勅卿望穆台符寄隆邦翰慶天元之維吉歸時事於有
司露奏形恭拊懷增嘆

賜給事中呂居簡轉官謝恩進馬詔

勅麟符刻玉奉寄留都輯上歲勞入拜青瑣權竒之貢
食我天閑省贖照誠載深嘉尚

賜宰臣韓琦生日進馬詔二道

勅秋律之初金氣已肅紀台臣之誕慶將內府之賜儀
遽披車府之封復上御閑之駿重循忠嚮良集褒嘉

勅卿望冠儒林材經皇業比辭上鉉之席往總北門之
符屬誕彌之戒辰顧匪頒之有典煩致謝禮良增歎懷
賜定國軍節度使梁適謝袷享加恩進馬詔

勅大袷之禮朕所未行諏辰孟冬欽於太室竣祠推澤
首被輔臣騫駿天閑良嘉忠嚮

賜彰信軍節度使同中書門下平章事李昭亮
賀裕享進馬詔

勅屬者涓孟冬之吉合清廟之祠享格祖宗之靈翕均
丞輔之福迺馳誠於北闕爰納貢於上閑載諒傾勤靡
忘嘉嘆

賜夏國主賀大行皇帝元節進馬詔

詔夏國主邦禍上延宸遊永隔逖念世封之守夙持獻
貢之來寵有常規勵於素節

賜外任臣僚知陳州李璋進端午馬詔

勅卿夙練戈韜荐分方寄當浴蘭之令節爰騫駿於上
閑載諒勤忠良深嘉矚

賜西京汝州祔葬皇親等茶藥詔

勅某同軌赴辰宗喪畢舉先原從卜孝慕何窮顧寒日
於喬林冒重氛於征陸爰將嘉賜俾輔至餼

賜宗室從信新婦并文安郡王等茶藥詔

勅從信新婦等哀奉仙輻肅安真域方冒凝寒之候載

馳長陸之勞申念丹誠往頒渥命

賜大內永嘉郡夫人朱氏等茶藥詔

勅朱氏等宮車晚出仙寢俄成悲侍輦於昔游結望陵
之終恨爰將嘉惠聊慰歸途

賜德妃苗氏等茶藥詔

勅德妃苗氏夙侍神駕甫安壽陵望丹蹕以長違奉玉
衣而永戀寒威貫序愛景馳空均賜御奩慰勤郊路

賜保平軍節度使兼侍中判大名府賈昌朝赴

闕茶藥詔

勅卿外易帥垣入趨台節適次神機之近正離伏暑之煩飭使驛之兼途致上奩之珍錫式推異禮以輔至和今差某官往汧路賜卿茶藥具如別錄至可領也

賜判許州賈昌朝過闕朝見茶藥詔

勅昌朝易符便鎮駐節近郊眷行李之攸勤屬寒暄之未適宜推邦錫以導時休今差某官賜卿茶藥具如別錄至可領也

獎諭韓琦詔

勅中書門下省所奏具悉夫天下之役常困吾民至使
離饑寒而不能以自存豈朕為民父母之意哉吾詔不
勤而察民未深也今梓州路獨興與民之利而去其害
欲加諸賞朕何愛焉觀執政之用心于朕豈有異乎韓
琦等已降勅獎諭仍各賜絹二百匹餘並依所奏施行
故茲詔示想宜知悉

賜龍圖閣直學士知審刑院盧士宗斷絕獎諭

詔四道

勅夫法令者治之具而非制治清濁之原也朕傷時之薄德不足以導民而至于用刑故選明察之官以審天下所上之獄諸疑者讞之而歲亡逮繫之淹書不云乎惟慎五刑以成三德茲亦惟予一人之有慶也非爾孰能之仍依奏宣付史館

又勅夫上之教化未至而欲民日遷善而遠罪其何由哉今夫內置理官以讞平天下之獄一歲之上繫亡留

文非曰職事之舉邪章聞予聽嘉歎久之

又勅刑罰所以輔治也以百姓未習于教化朕敢弛姦
之防今爾迪于刑之中使天下繫無所淹留書不云乎
哲人惟刑無疆之辭屬于五極咸中有慶予惟爾嘉之
仍依奏宣付史館

又勅朕患天下吏用法之不平又因緣生姦所欲活則
傳生議所欲陷則予死比未嘗不惻然于中故以廷尉
所上獄更命近臣其審克之視一歲所決而亡留繫之

苛雖未能造成康之隆然亦適于用刑之中輔民起治
顧不汝嘉乎仍依奏宣付史館

賜翰林學士賈黯進宴羣玉殿詩獎諭詔

勅三聖之文祕在延閣朕秉聽政之豫詔近臣以觀之
且陳鐘鼓豆觴之盛以娛乎太平卿與游詞禁材思丰
華奏篇之來絕于羣唱省披者再式歎式嘉

賜天章閣待制權知審刑院呂公著斷絕獎諭

詔

勅夫古之用刑蓋所以期無刑也朕念哀元元離法者衆天下所上廷尉之獄又命官以審之庶幾罰當而奸少止矣卿文學之臣副之政事能率其屬蔽斷無留嘉歎之懷曷維其已仍依奏付史館

賜樞密使文彥博乞罷節度使公使錢獎諭詔勅彥博省中書准樞密院劄子奏卿因進呈宗室公使錢文字嘗言樞密使帶節度使不當例受公使錢今檢去年八月臣所奏劄子上進伏望許從寢罷事朕日財

萬幾晨訪近輔而卿因錄先朝之奏草載辭舊府之公
錢乃謂在外則有犒軍師之常在內則無享賓寮之事
顧敢受于私室願悉還于縣官朕惟德盛者必約諸身
計遠者必體于國故曾子輕楚人之富何慊義之所存
汾陽佐蕃市之取衆謂忠之尤至勉從嘉舉重集褒懷
所請已依故茲獎諭想宜知悉

賜天章閣待制權知審刑院孫固斷絕獎諭

詔

勅夫刑者本以助治也民之嗷嗷不能無過差而入于刑非艾決其所滯亭其所疑則刑將殘民而不可勝尚何治之足助乎卿雅以儒學進而典天下之刑讞而當情亡留獄良有以應予欽慎之意也其於嘉美終日以之仍依奏宣付史館

賜龍圖閣直學士知審刑院錢象先斷絕獎諭
詔二道

勅蓋聞唐虞之時畫衣冠而民不犯朕甚慕之今朕咨

擇近臣以審夫天下之獄章上廷尉者讞之輒空雖未能做古要之不僭用刑其亦庶幾乎興言褒歎不忘于懷仍依奏宣付史館

又勅夫立法明刑非以為治蓋以禦暴嫚輔政教之所施也朕惟人之多辟比置羣吏申審克之制以參決其平卿持法詳明盡心乃事具獄之上奏讞悉空省閱之餘特深嘉尚仍依奏宣付史館

立皇子詔

人道親親王者之所先務也蓋二帝之隆治繇茲出朕甚慕之右衛大將軍岳州團練使曙皇兄濮安懿王子猶朕之子也少鞠於宮中而聰智仁賢見于夙成日者選于宗子近籍命以治宗正之事使使者數至其第廼崇執謙退久不受命朕默然有嘉焉朕蒙先帝遺德奉承聖業罔敢失墜夫立愛之道自親者始固可以厚天下之風而上以嚴夫宗廟也其以曙為皇子

皇太后付中書門下還政書

日者昊天不弔先帝上賓遽揚末命之言方結未亡之痛而皇帝踐祚之始銜哀過情忽傳詔于外廷請預聞于庶政載念承邦之重累申還辟之文皇哀未回羣聽猶鬱顧人子之誠雖至而國家之事靡安况日聽治朝躬發神明之斷出馳禁趨衆聞輿馬之音百姓莫不交欣三靈以之薦祉吾嘗視前史之戒思繫聖之圖將退飭于毋儀庸進彊于君德從容房闈不亦美歟昨權同聽政事候皇帝康復日如舊去歲曾兩降手書還政輔

臣等並于皇帝御前納下今來聖躬已安好其軍國事更不同處分故茲示諭宜體至懷

戒諭夏國主詔

維乃祖考克有西土世為漢藩輔今爾弗蹈于前烈迺竊署重爵以奉幣于朝方邊吏拒還乃復稽留境上不
及廷見之期洎朕親擡貢函而僭我王命實如所聞朕
疑風俗荒遠未達朝廷之儀雖然棄信慢常誼不可長
其務思先世之約以保綏于斯民毋忽是圖以奸我有

邦之罰今後所差使人即不得僭擬

賜光祿卿知濟州楊申訓兵有法獎諭詔

勅楊申近抽到武衛忠果兩指揮於前引呈軍等異事
兵法曰卒不可用以其將予敵也朕患諸道之兵簡練
之不精乃親閱戰士于庭而京東之兵頗知戰而有勇
然其所以簡練之法不在主吏乎朕甚嘉之

賜參知政事歐陽修生日禮物詔

勅炎律徂威高閭畜慶誕生賢德來輔聖圖將嘉賜于

舊儀助蕃釐于今旦眷言忠碩式是倚毗

賜皇子曙免恩命第二表不允詔

勅皇子曙省所再上表乞還寵命蒙降詔不允者未遂私誠莫違寧處敢汙斧鉞再布腹心伏以黜幽闇而陞昭明考功能而定爵位朝廷所以砥礪天下而天下之士得以重輕朝廷是深可戒懼而畏惕者也惟陛下聖明既已子臣而微臣愚戇既已父陛下矣則當教之使知道豈可私之使竊天官况藩宣重大之任禦侮雄

權臣實無狀不知優寵之所自蓋陛下徒私小臣而忽天下之儀使賢不肖無所勸沮臣曷敢以為榮而致於私親之過哉所有誥勅不敢祇受早賜寢停事具悉昔周之建國必先同姓之盟況予父子之愛乎夫爵祿者朝廷之公器也朕既外隆以賢又內篤以親而公天下非為私也今命書之下衆牘固辭豈副予親親之意所乞宜不允令便授誥勅故茲詔示想宜知悉

賜皇子曙免恩命第三表不允詔

朕惟先王治國之法必繇近者始故申父子之至恩則天下歡然以相愛也今爾奉書者三謂爵命之不可私朕固嘗咨於政事之臣未以為過寵也且予貴為人上而能不福女乎雖欲勉從嘉意良不可得所乞宜不允今便授誥勅故茲詔示想宜知悉

仁宗遺詔

詔内外文武百寮等朕祇承大統夙夜孜孜常懼匪涼不足以承祖宗之鴻烈然兵民休靖底于丕平顧朕何

德以堪之乃自春以來積勤爽豫今至大漸恐不得負
宸以見羣臣皇子曙以天性之愛朝夕寢門未始少懈
况聰知明睿朕素有承嗣之託夫豈不順天人之望哉
可於柩前即皇帝位皇后以坤儀之尊左右朕躬慈仁
端順聞於天下宜尊皇后為皇太后一應諸軍賞給並
取嗣君處分喪服以日易月山陵制度務從儉約在外
羣臣止於本處舉哀不得擅離治所成服三日而除一
應緣邊州鎮皆以金草從事不用舉哀於戲死生之際

維聖賢為能達其歸矧天之寶命不墜於我有邦更賴
文武列辟輔其不逮朕何慊焉主者施行

--	--	--	--	--	--	--	--	--